

兩
當
軒
全
集

兩當軒集卷第十七

武進黃景仁著

詩餘七十四首

減蘭

夜泊采石

一肩行李依舊租船來
詠史四顧無人君憶元暉我憶君
江山如此博得青蓮心肯死
懷古悠然雁叫蘆花水拍天

憶餘杭

夜起

錄曲紅欄欹斷沼潑刺遊鱗窺夢悄
披衣四聽闌無聲長夜可憐清
愁中心似闌中月一片模糊難擺脫
冷風吹月入雲端連月不教看

大有

秋夜有懷次洪稚存韻

破帽尖風逗窗斜月耐十分秋枕寒悄數征期重陽節候
將到夜長自擁蘆花被共四壁冷蛩都覺幾處水上樓臺
一天雁聲籠罩 狂蹤跡空自笑泔水任漂流土人爭說
來往江潭回首驚魂堪弔聞說故園霜菊疏籬畔數枝斜
靠還憶煞歲歲花前箇人清妙

醜奴兒慢

春日

日日登樓一換一番春色者似捲如流春日誰道遲遲一
片野風吹草草背白烟飛頽牆左側小桃放了沒箇人知
徘徊花下分明認得三五年時是何人挑將竹淚黏上
空枝請試低頭影兒憔悴浸春池此閒深處是伊歸路莫

學相思

貧也樂

一匹馬千金買邯鄲少年有聲價唱龍沙拍胡笳吾曹健
兒不聽箏琵琶漢家邊釁今朝始去去同生復同死天
蒼蒼野茫茫一片秦時明月掛邊牆

虞美人

閨中初春

繡罷頻呵拈線手昨夜交完九問春何處最多些只在淺
斟低唱那人家半枝嫩柳當窗放偷得新眉樣晚霞一
抹影池塘那有者般顏色作衣裳

綺羅香

金陵懷古

何處獅兒半空飛下橫惹江東多事霜驟金戈開出千年

佳麗渡永嘉雜沓名流寶鍾阜綿延王氣到如今一半興
亡南飛烏鵲尙能記 莫問臨春結綺共澄心百尺一樣
南內回首新亭消得幾行清淚歎曲裏錦樣家山禁幾回
北兵飛至只添他來往詞人多少滄桑意

臨江仙

中秋夜秦淮水榭

三載紅橋舊路輕塵暗換年華依然燈火照香車玉簫吹
子夜明月在誰家 前度青衫淚溼重來破帽簷斜帶人
風景又天涯垂楊空繫馬流水有歸鴉

貂裘換酒

秋蟬

聒耳真無賴到風前一聲知了樹閒秋在漸似詩人才盡
日尙作悠揚寒籟只此後青林難賣疏柳幾行臨水驛把

吟軀聽瘦斜陽外巴山磬清相賽
魂銷齊女芳華退更
增他淒涼宮鬢愁紅慘黛痾瘦林中休作惡風露餘生堪
貸珍重吸枝頭沉瀝畢竟侍中冠上物任孤高難把深秋
耐仙蛻去好相待

前調 秋雁

蕭蕭穿雲縫是無情一天冷雁將秋來送白草黃榆經不
盡帶得商飈瀕洞早吹度秦川朔隴幾處高樓聞太息把
邊聲撥入砧聲空好防卻金丸中 洞庭木落微波動記
清宵蘆花明月依依曾共偏向霜前悲故國叫得楚天如
夢渾似聽伊涼數弄聲漸不聞天更遠更衡陽萬里須珍
重回首處離雲凍

滿江紅

感舊

酒渴香消夢汝在意錢庭院依舊是春潮生頰露桃如面
病後腰成花一捻別來淚繳珠千串訴侯門多少苦和辛
紅妝賤鸞掩鏡蟬分鈿南去鵲西飛雁嘆崔郊戎昱千
秋空羨二月竹枝辭峽恨三更柘舞臨湘怨夢回時斜月
滿關山無人見

昭君怨

初夏

一自護花消瘦病過折綿時候春去已天邊又今年
擁住薄衾如水守得篆灰心死簾動有誰來是風開

拋毬樂

元日病中作

驀然沈睡驚醒一歲今又聽紛紛試庚傳勝塵容難耐閒

情非舊有無限好景低徊拌只向蒲團消受可憎二豎尋
人攙著吟魔按住呼盧手嘆眼前兒女背人貪長祝來富
貴於吾何有強起捧金卮揮淚眼含笑爲親壽幸妝成椎
髻操作前來梁鴻有婦去歲一葉扁舟正此日襟被瀟
湘口楚巫喧蠻鼓賽對景幾回搔首敗擗驚風今日團圓
豈偶也被似水流光似夢前塵愁釀成衰醜任飛揚跋扈
鷲肩火色流連落拓婦人醇酒且莫負名山論事業尙有
今而後問春到誰邊門前凍柳

虞美人

吳淞道中

吳淞江上行人去細雨征帆驚此時無限是離心卻似五
湖烟水萬重深 鴟尾一舸今何處徙倚烟花暮沈沈吳

苑太匆匆只在前溪一曲棹歌中

沁園春

閩門夜泊遇鄭十一卽席有贈

君來維揚我來毘陵相逢古吳正水槎鳴綠剛搖畫艇
浮蟻白飽貯金壺柳結同心花開異地紅燭題詩與有無
君須飲看吳宮走鹿越榭啼烏青衫失路唏噓剩詞客
江東老鷓鴣歎絮泥染因風思起灰非心死向暖還蘇
帳底清歌樽前白髮醉矣還教紅袖扶明朝事且歸須緩
緩唱莫烏烏

減蘭

題鄭澗夫圖照

千年風葉四面秋聲聲撼撼窈窕冥冥如此林嵐大有人
一株枯樹是我十年吟斷處展卷沈吟觸起聞雞五夜

心

· 酷相思 春暮

猶記去年寒食暮會共約桃根渡算花落花開今又度人
去也春何處春去也人何處 如此淒涼風更雨便去也
還須住待覓遍天涯芳草路小舟也山無數小樓也山無
數

昭君怨

門外月明如畫窗內一燈如豆何物影空梁水雲光 忽
聽遠鐘微度又被曉風約住此際惱閒情是浮名

鳳凰臺上憶吹簫

洪稚存悼蕩女和韻廣之

來是何心去耶眞幻爲他放下簾鉤算浦珠初孕嵐黛旋

收略似一灣新月初生也卽便難畱惆悵處紅茵繡襪觸
眼成愁 休休西風又起早一葉梧桐吹下高樓莫聽簫
午夜挑斷銀篝擺脫紅塵浩劫彭殤盡一樣荒邱休頻憶
經春鶴夢總付悠悠

蘭陵王

十六夜借稚存泛月溪上次韻

清光足卻似君才萬斛把琴樽挈下扁舟拂袖凌風入空
廓一更天似沐兩槩亂衝寒玉展眼處枯木蒼葭古意茫
茫墮高閣 慙慙杯共屬歎錦瑟年華幾時堪復姮娥此
景休相促待五岳游過九州閱遍者回攜口白雲宿禽魚
共徵逐 滅燭湖寒淥漸鐵笛將殘葛衣嫌薄一聲歸櫓
空林角倘此閒無爾今宵少僕城南明月可也悽慘孤獨

鵲踏枝 寄龔梓樹

記得去年寒食暮細馬輕衫花裏揚鞭去一路樓頭招袖
語銀箏彈遍蕭郎句 三五冰輪簷際吐爲問鷺鳥今夜
棲何處兩地相思無一語燕南趙北多紅樹

幾度緘詩愁共寄望斷樓頭不見雙雙鯉常是故人書一
紙手香三載畱懷裏 我亦飄零無定止君贈梅花莫問
江南使日暮紅塵飛又起天邊何處無歸騎

采桑子 虞山旅舍送稚存歸里

荒雞喔喔山鐘歇醉也麼哥睡也麼哥酒味爭如別味多
送君歸去吾仍客歸意如何客意如何雁叫霜天月浸
波

念奴嬌

虞山旅舍夜起是日稚存歸里

迷茫烟樹算離腸曾斷幾回南浦遮莫九龍山下月今夜
是君行處一葉舟輕片帆風飽欲住何能住憑君孤棹引
吾鄉夢歸去夢到阿母闈前須臾復向高館和君語此
際烏啼星作作涼露碧天如水好事纔圓羈鴻又唱一枕
瀟瀟雨蘭缸細剔淒淒城上更鼓

醉春風

幽約

望斷青鸞信寂寞瑤階冷昨宵已下死工夫肯肯鼻盡
爐烟敲殘棋子移來花影懶步挑缸燼珠斗斜還整柳
梢月上已三更等等憶著幽歡縱教沈醉也應驚醒

減蘭

中秋夜感舊

露濃烟重一陣衣香何處送倚遍回廊九曲欄杆九曲腸
去年今夕木犀花底曾相識此夜花前只有清光似去
年

相思誰說水晶簾外朦朧月憎煞嬋娟偏對樓頭作意圓
綺窗人靜露寒今夜無人問廿四橋頭一曲簫聲何處
樓

蝶戀花

我是揚州狂杜牧似水間情占得烟花目酒醒月明花
斂小紅樓上春寒獨猶記綠陰深處宿簾捲東風重把
幽期續淚眼細將紅豆囑那人家住雷塘曲

醜奴兒令

春夜

春陰底事濃如結，半是離愁，半是春愁。釀得廉纖雨一樓。
霎時雲散，天如洗，月似銀鉤。涼似新秋，嫩綠池塘溼未收。

珊珊弱骨臨風倚，遮莫衣單。況是春寒。一半憐伊不忍看。
欲行乍卻羞眸睇，背立欄杆。偷整雲鬟。半臂輕涼露未乾。

減蘭 登吳山遇雨

亂山無數試問春歸歸底處，天際鷺毛一髮錢塘暮雨潮。
雨來江市黯黯半天雲，掛地白鷺飛還片片輕舟盡落

帆

滿江紅 題岳仲子鄂清吟詩後

老子當年曾幾醉南樓
夜月但慘淡獅兒霸氣斷戈沈戰
一片武昌秋柳綠三更鵠渚寒
濤急問扁舟誰叫落梅風
聲聲笛 高宴會西園集狂嘯傲南州
客向殘山剩水射
棚行炙安樂宮門無片瓦
呂蒙城畔餘殘堞想先生憑弔
日登臨悲秋極

鄂國王孫認一片精忠餘烈想當日偏師背水旌旗獵獵
帳外濤衝猿鶴警軍中夜冷魚龍寂到而今急雨打空江
猶嗚咽 沈不盡橫江鐵燒不斷臨江壁儘茫茫古意亂
填胸臆十載雄名留幕府興酣如此方搖筆把新詩點染
舊江山都生色

僕木狂奴頻掩卷壯懷陡發翹首處
大江西上暮雲明滅

樓上有人題健句郢中自古生詞客算浮生何日鷺扁舟
衝雙屐 高吟罷雞聲歇獨酌倦殘釭沒忽天風吹夢長
鯨噴雪下界霜鐘催去急倒看萬頃蘋洲白鷺驚回風雪
鎖嚴城空淒切

虞美人 奔

昨宵博塞今宵奔曲院雲屏隔月明猶界粉窗梅只此春
宵一局不須催 金枰碎玉敲還寂覓箇中心劫心知負
了暈紅腮忽地笑拈雙子倩郎猜

疏影 秋思

塵衣初典卻一番商信吹下空館半枕還鄉裊作輕雲隔
斷楚天來雁請看十萬江南戶只一夜秋聲都遍作朝來

微雨廉纖失卻越山數點 尙有濛濛遠樹捲湘簾細認
烟水無限畫艇溪橋幾陣金風流出敗荷一片小橫塘唱
愁眸睇正賀老臨風瘦減忽低頭瓜果筵前孤負深閨歡

讌

滿江紅

京口感懷寄洪大稚存左二仲甫

嶽嶺西頭曾醉過幾場明月屈指算經年抱恙三秋作客
白浪驅人貧有效西風剝夢愁無跡到江山勝處忽悲來
頭堪白 萬里下岷峨雪千古瀉英雄血只茫茫入海無
聊之極二十年來堪悔事一聲山寺霜鐘歇問南徐風景
近何如歸來說

點絳脣

春宵

宿酒初醒閒情似水和腸軟細雨三更簾外春陰捲
一樹梅花落向閒庭院無人管冷風過處點點春愁糝

前調 雨霽

瘦骨無情年年此際懨懨病小立風前討箇傷春信
淡月微雲作出春宵景斜暈整斷無人處卍字闌干影

浪淘沙 幽會

連日愛新涼更短更長昨宵沈醉甚心腸百樣溫柔呼不
起裊盡爐香 今夜醉柔鄉且費商量和衣霍地倒銀牀
不合郎來偷一覷漏了春光

前調 懷閔季心

交識滿浮生健者惟卿憶從相識在蕪城一揖四筵皆失

色氣是幽并 荷戟靖邊庭歸去呼鷹生憎脰管與繁箏
箭叫一聲雕落地笑絕冠纓

前調

洪對巖

古渡白雲封今雨樓空我歌紅豆恨重重纔出新詞君拍
手花底相逢 驪唱各匆匆流水西東馬頭細草又春風
檀板金樽山月曉懊煞吳儂

前調

徐芸圃

人靜露溥溥別意闌珊桂花庭院捲簾看今夜月明應夢
我同倚闌干 頃寄見懷詩云今夜月明應入夢桂花庭院捲簾看 世味各鹹酸工
到愁難風前玉立瘦無端只恐夜深應化去化作幽蘭

如夢令

曉遇

細雪乍晴時候細水曲池冰皺忽地笑相逢折得玉梅盈
手肯否肯否贈與一枝消酒

聞說玉郎消瘦底事清晨獨走報道未曾眠獨立閒階等
久寒否寒否剛是昨宵三九

一陣雀聲噪過滿院沈沈人臥此去是書齋只在春波樓
左且坐且坐我共卿卿兩箇

一抹蓬鬆香鬢繡帶綰春深淺忽地轉星眸因甚紅潮暈
臉不見不見日上珠簾一綫

沁園春 夢斷

裊若輕烟疾若驚鴻噫嘻怪哉正幽幽咽咽鴉啼古屋淒
淒楚楚月冷窗梅幾載相思連宵入夢今夜銅鑿風動開

聞說道有千重巨浪萬頃驚雷 如今雨打風吹只一點
殘燈未死灰倘飄零重訴卿應有恨蛟龍未醒僕願相隨
去是何心歸還底處鶴唳橫空到枕來高樓外有荒雞喔
喔戍鼓哀哀

醉花陰

春困

錦幕輕風吹又動放去惺忪夢生怕捲珠簾尺五春陰壓
得眉尖重 滿院姊歸花外唳測測寒飈送昨日上高樓
南北東西芳草何曾空

千秋歲

花朝

花朝到了扶病披衣早春只半愁先老數聲風共雨一片
烟和草閒情似游絲一縷空中裊 牒報東君道蜂蝶休

相擾別來久依然好一杯爲汝壽千萬君應保休只似年
年歲歲教人惱

鶯啼序

鄭誠齋先生招集白雲菴周幔亭圖爲小
情分賦用曹以南韻

童子何知解頷略溪山詩酒也繾綣折柬招來追隨許附
塵後疊嶂忽嵌高閣聳巉磯怒拍江聲吼只畫圖深處幾
箇閒人消受 兩袖空中長襟風際眞箇雲生肘認微茫
城西十寺疏鐘飄度溪阜界隨青眼放時寬情到醇醪傾
處厚忽清談天外吹來霏霏璫玳 書生此際頓露昔時
狂態幾曾言擇口更十五雲郎喚向尊前歌聲清濁幔亭
有小
僮善 客解吹簫 有客施姓者
能吹洞簫 郎能顧曲 曲皆幔
亭自製 當筵相對
移情否問此樂天涯幾人有閒情豪興一齊迸向吟腸難

按處傾一斗 夜云深矣飽酌金罍四座交相壽待到歡
闌綺席推起山窗明星欲滴蒼烟如糝堤邊燈火酒人歸
去數聲爆竹千山響更深潭驚起蛟龍走者般高會曾逢
他日溪山多應不朽

木蘭花慢

月下登虞山哭邵叔山先生

君來因底事今依舊主芙蓉空廿載經窗半生閨苑名落
寰中只何故奪君恁早詎天心真箇忌才工萬里月明慘
慘五更海霧濛濛 九原休恨別匆匆天上更相逢待鶴
唳歸來鐘鳴蕭寺影落青楓今宵故人來此問吟情可與
舊時同千點淚珠零雨數絲霜鬢臨風

人間呼殆遍君似醉也應醒但枯樹黏天浮雲掛地有影

無形痛一點墓門紫火空嘔將心血誤浮名一自子期去
後曲終江上峰青 南沙城枕向湖濱曾約共登臨怎芒
屨來時青山有恨流水無聲此間玉霄不遠叩天關風雨
泣山靈千載仲雍言偃一般蔓草荒城

二墓皆在虞山

風流子 前題

余年剛弱冠曾飲博慣縱狹斜場幸北海尊前容吾跌宕
東山座上恕我疏狂相將久庭前逢玉樹帳後識諸郎綠
酒黃花時陪歡譙風晨月夕每話行藏 其間頗離別空
江明月野渡清霜幾度詩緘遠道瓣祝名香詎半生落拓
天僧遇合數行風雨碑斷文章一夢蟻窩醒也萬古斜陽
哲人今萎矣算百歲齒髮未凋殘怪庚子日斜妖禽有驗

龍蛇歲在惡夢無端倪望處徵車來地下丹詔別人閒講
院歸來半牀書掩夜臺吟罷數杵鐘闌 楓林紅于血荒
岡淚灑萬樹齊殷下有纍纍古塚不辨何年想先生當日
也曾憑弔此時弟子空哭青山月落屋梁時候想見蒼顏

風馬兒 幽憶

子規窗外一聲聲把醉也醒醒夢也醒醒細憶別時情狀
忒分明盈盈 夜長孤館更清清把鐘也聽聽漏也聽聽
直到五更斜月落疏櫺冥冥

鳳凰臺上憶吹簫 秋感

試望平原悲哉氣也人閒無處宜秋被幾番哀樂白了人
頭休道虎頭燕頰誰曾望萬里封侯空惹下一天憔悴半

世恩仇 漂流殊自悼 口歎人皆欲殺我 定何尤 只風聲
鶴唳聽也 都愁堪笑 百年終盡瀛州遠 大藥難求 聊自廣
逍遙 齊物隨化悠悠

南浦

泊鎮海

蛟門中劈看天邊 一葉破空來 又向斷磯荒嶼 泊入浪花
堆多少 鬣帆蜃雨和龍吟 夜半似驚雷 更颺風驟起 含腥
帶溼 白日冷於灰 此地孫盧戰後 警烽烟 幾度海門開
還笑建炎南避君 相總偕才 回首亂鴉殘堞 聽沈沈戍鼓
有餘哀 嘆蕭條身世 海天空處 獨銜杯

水調歌頭

仇二以湖湘道遠且憐余病勸勿往詞以謝之

一事與君說 君莫苦羈留 百年過隙 駒耳行矣 復何求 且

耐殘羹冷炙還受曉風殘月博得十年遊若待嫁娶畢白
髮待人不離擊筑驪彈缺粲登樓僕雖不及若輩頗抱
古今愁此去月明千里且把離騷一卷讀下洞庭舟大笑
揖君去帆勢破清秋

金縷曲

勞謙叔手書大悲咒以贈云誦此可卻一切魔障報之以此

落魄吾之分歎年來病魔窮祟公然作橫君說驅除眞易
耳此事吾能爲政論慧力圖澄堪證一卷貝多魑魅避更
波濤可與蛟龍逆還說與堪續命檀那衣鉢何曾吝更
兼他雄詞辟瘴光芒難近時有贈詩此去天南山鬼哭脫卻女
蘿逃盡更鑿險降魔杵奮云曾有讀者見天神隨護只恐夜深驚屈宋
月明中難把騷魂認一長笑謝君贈

前調

仇麗亭邀飲吳山卽用前韻

飲啄皆吾分笑年年屠門大嚼老饕太橫脫帽翻尊狂不
減管甚森嚴酒政問潦倒霜毛作證賤子胸中饒塊壘儘
枯腸甘與糟邱迸任百罰諸公命緒言領畧何曾吝聽
懸河分棚對壘詞鋒難近忽忽臨風來苦語此地一杯須
盡更鯨吸爲君重奮別意酒悲渾不辨待重來再把吳山
認雲海誼好投贈

滿江紅

贈王桐巢

何物書生曾躍馬炎天雪窖論家世過江檠戟文章忠孝
蕉鹿幾番驚往事關山若箇常年少更飄零一夢落青樓
從頭覺湘月落青猿笑楚天闊哀鴻叫把離騷痛讀千

秋同調好賦十年畱恨別雄心獨夜歸屠釣訂他時書卷
換漁蓑吳淞棹

齊天樂

二月十三夜宴汪笛舫宅

楚天一夜東風到吹綠萬家烟井新燕樓臺早鶯門巷寫
出異鄉風景歌筵坐穩算年盡逢丁夜將達丙紅燭如山
唱澈金元院中本主人好客絲難繡看紛紛投轄重門
鑰冷切切鷓絃淵淵羯鼓不醉教人怎肯當杯猛醒道此
是天涯陶然滿引檀板驚飛笑山禽村甚

時余酒
困先逸

換巢鸞鳳

十四夜宴王崑圃宅

日煖新晴正柳青客舍花放春城南樓裙屐滿西閣管絃
盈主人談是過江清口雜四座齊諧楚聲聽歌忽似一縷

游絲初定 夜靜孤月正銀燭光寒中酒人微病趙魏謀
歡應劉作劇意氣公然豪橫算二十年幾曾逢再三千里
吾何恨鞚歸鞭有輕塵把馬蹄碾

氏州第一 花朝

昨夜狂風拔木發瓦五更大雨而止一睡瞢騰醒來獨怪
嫩日軟陰如水莫道春猶淺青上柳梢來矣猛記今朝百
花生日舊愁提起 猶憶去年曾懺汝口繡佛旃檀香裏
一喘吟魂廿番花事薄福都如紙昔時風亭月榭曾消得
幾遍彈指且掩重門任戶外剪紅揉紫

虞美人 春風

連晨驟煖春衣脫一雨寒幾雪舉杯長笑問天公作盡炎

涼何必在春風 晚來孤館苔痕閉冷冷清清地小窗破
紙木無多吹過甘番花信更如何

七娘子 山行遇雨

一鞭裊入千山裏樵歌洗胃鶯鍼耳忽露青帘低飄竹塢
典衣爛醉今朝始 孤村流水桃兼李此閒小住真佳矣
似有風來驟聞澗響子規啼處春陰起

摸魚兒 寒食漫興

夢驚回今朝冷節天陰難得窗亮弄晴作雨春無賴不管
有人惆悵休惆悵猶喜是天涯對酒人無恙酒杯莫放算
落盡辛夷將飛柳絮好把碧欄傍 鄉園樂今日榆莢花
釀觴簫吹煖門巷歲歲風前悲蕩子愁煞棠梨鬼唱登樓

望問風景江南半點何曾像離波新漲但芳草天涯遠山一角不語黯相向

憶秦娥

湖天闊清湘望斷三更月三更月猿聲是淚鶻聲是血
曲終數點烟鬢沒此閒自古離愁窟離愁窟幾叢斑竹臨
江猶活

百字令

登益陽城樓

桃花江上向西風落葉敵樓孤凭尙有秦時明月在縣爲秦建
黯黯蠻山相映桂郡南連零陵西拒地制湘東命幾多蝸
角紛紛蠻觸爭進 當日赤壁功成左將軍作事將毋太
橫從此孫劉誇割據我笑大言子敬故壘千秋土山一帶

想像軍容盛耕民可見苔花敗鏃遺賸

水調歌頭

岳陽樓

豈是夢中到始覺楚天長軒皇張樂去後太古別離場一
曲湘靈鼓罷再聽汜人歌盡天老月荒荒十二晚峰碧萬
里瘴雲黃 龍鎖脫蛇骨斷蚌帆張陰陰一片腥起微帶
酒花香不用憑軒流涕只要朗吟飛去倒影落瀟湘揮手
謝時輩千載定還鄉

霜葉飛

湘江夜泊

倩誰爲問瀟湘水緣何一碧能爾自從葬了屈靈均只想
成烟矣不信道騷魂未死月明淒苦猶如此算地老天荒
那一角蒼梧野外多少山鬼 我欲寸磔蛟龍將君遺骨

捧出萬丈潭底請看往日細腰宮是一堆荆杞又恐惹衝
冠髮指問天呵壁從頭起還伴他□□□霧鬢烟鬢一雙
帝子

洞庭春色

登黃鶴樓

爲問司勳誰家樓也而汝題詩算吾宗老輩子安去久玉
京舊侶叔瑋來遲今日我遊因薄譴看城郭人民半是非
還聞說又吳宮楚館電捲星移 千年謫仙又去空傳語
天上相思望三湘七澤無邊水氣荆門郢樹一片斜暉只
有此樓常不改與江漢茫茫無盡期歸與好把落梅短笛
鶴背橫吹

南浦

江口夜泊

蒼茫葭菼聽西風夾岸響騷騷身是洞庭一葉流下漢江
皋莫問殘山賸水歎興亡一半屬孫曹其細腰池館章華
臺殿一樣草蕭蕭何處數聲蘆管隔江沙人倚木蘭橈
多少倚篷心事天外水迢迢寂寞郢中白雪悵騷魂千古
□難招且扁舟歸去五湖三泖任逍遙

兩當軒集卷第十七

兩當軒集卷第十八

武進黃景仁著

詩餘六十六首

風流子

江上遇舊

眞耶其夢也移舟語悽惻不堪聽道那時一見庾郎年少
此閒重遇長史飄零□□□□□□□□□□□□□□我
未成名卿今已嫁卿須憐我我更憐卿 潯陽江頭住把
去來帆看極浦無情憔悴感君一顧百劫心銘問此時意
致秋山淺黛再來蹤跡大海浮萍語罷揚帆去也似醉初

醒

雨中花慢

泊潯陽

未入吳雲猶依楚岸三千里外還家對屏風九疊艤住孤
艤是日江濤陡發五更人語齊譁推篷一望江州夜火十
里金蛇 曉來攜笛吹入江天惹他雁起平沙還朗誦白
家好句楓葉蘆花我亦青衫有淚況今落魄天涯閒愁萬
種打篷細雨錯認琵琶

采桑子

九日題江州海天寺

客愁底事腸回九九派潯陽九日重陽九疊匡廬對舉觴
前人幾輩消沈去老子樓荒老嫗亭荒且對江天醉一
場

青玉案

泊石鐘山下

噌吰巨響湖心裏石作竅風穿矢石本無聲聲在水夜深

老鶻非關人語自會摩崖起
崖閒似有殘碑記欲讀高
寒不能矣多分簡鄙兼陋李蒼松兩樹月中猶認蘇氏賢
喬梓

喜遷鶯

舟過馬當山下

清江見石尙沙痕十丈濤頭千尺鯨浪狂衝蛟涎亂捲百
鍊崖根鐵色太行呂梁合險說也教人頭白行不得快招
手烟波喚他估客 帆直風助力瞥眼經過回首金山黑
獻履題詩當筵作序此事羨渠何益江神一言聽我我是
海東頭客再休惜再一帆相助吹還鄉國

憶真妃

彭澤

衝波輦笛響悠悠水風柔放下布帆幾葉蕩中流 鞋山

香彭郎到小孤浮今夜西江月好幾人愁

望遠行

采石

巍然一畝精鐵色不遣濤頭衝去夾岸成營沿江設壘多
少南朝殘戍爲問山靈當日韓家擒虎到此怎教橫渡更
一帆吹送樓船難住 何處覓箇漁樵閒話見來往精靈
無數一片黃蘆半輪西日襯出歷陽烟樹畢竟上流荆益
中原鳳泗方算江東門戶者一拳能幾幾曾堪據

木蘭花慢

京口清明

今朝風日媚佳節好怎耐在天涯只無情無緒閒吟閒詠
江草江花停尊陡然興發寫旗亭破壁數行斜柳外蕭郎
白馬門前謝女香車 臨風不斷淚如麻何物換年華歎

秋娘老去青山依舊望眼空遮平添異鄉烟景問游人誰肯不思家唱罷江樓囉噴來聽商婦琵琶

念奴嬌

憶城東舊遊寄稚存維衍

東城古院記寒宵曾聚詞壇數子爽逕松楸風獵獵霜冷月華如水破壁潛蹤深林幽嘯乍見疑山鬼頽唐失路釀成狂態如此屈指分手河梁聯吟江滸往事隨波駛異地逢迎原不少無奈心情不是便欲橫江化爲孤鶴飛透吳雲裏開簾一笑瞿曇今又歸矣

稚存常呼余爲黃面瞿曇

前調

京口重訪僧寺

蒜峯西路記昔年曾入森陰古寺連日石尤風作惡天遣重尋舊地笑問僧雛那時一見此景會忘未惹他沈想依

稀一半還記 那日風起蘋洲雨昏山閣到此閒題字語
罷青瞳剛一轉頓觸隔年情事几榻依然往來閱盡耐久
禪家味徘徊簷下魂魂浮動江氣

賀新郎

太白墓和稚存韻

何事催人老是幾處殘山賸水閒憑閒吊此是青蓮埋骨
地宅近謝家之朧總一樣文人宿草只爲先生名在上問
青天有句何能好打一幅思君稿 夢中昨夜逢君笑把
千年蓬萊清淺舊遊相告更問後來誰似我我道才如君
少有或是寒郊瘦島語罷看君長揖去頓身輕一葉如飛
鳥殘夢醒雞鳴了

點絳脣

細草空林絲絲冷雨攪風片瘦小孤魂伴箇人兒便 寂
寞泉臺今夜呼君遍朦朧見鬼燈一綫露出桃花面

醉落魄

當塗客舍醉中感懷

臨風痛酌人生果信當行樂幾曾泉下人重作對面青山
葬老青蓮魄 伊唔□□□仰屋六州鐵鑄從前錯畢竟
韶華難再續笑問流光可許千杯贖

青玉案

春光漸到梅根冷傷離莫謀懽且無奈柔腸愁易惹誰家
歌管此閒亭榭少箇憑闌者 綺窗密語誰同寫待寄蠻
箋淚盈把報道綠梅將放也一年又盡少年幾日告箇尋
花假

西河

江上聞笛

遙隔浦聲聲似泣如訴知伊不過背鄉關怨何爾許茫茫
一片水烟中聽來誰不悽楚 既非是亡國女家山重疊
無主又非萬里玉門關送人遠戍只將花月好春江吹他
落梅如雨 少焉我亦欲起舞漸鄰舟嘖嘖嗟苦若再橫
吹將去怕波心不有蛟龍取到曉尋聲知何處

太常引

空館

屋多人少夢難成落葉響縱橫冷雨太無情又灑過三聲
兩聲 人言此地更深漏永常見走英靈小語在空亭悄
立到窗兒外聽

訴衷情

萋萋芳若滿平洲雙槳去悠悠一片落紅漂到江水不勝柔
烟樹外望歸舟識歸舟眼中明月圓在揚州缺到西
州

賣花聲

立春

獨飲對辛盤愁上眉鸞樓窗今夜且休關前度落紅流到
海燕子銜還書貼更簪歡舊例都刪到時風雪滿千山
年去年來常不老春比人頑

賀新郎

辛卯除夕呈朱筍河先生

一歲過將盡受幾處颿衝浪打羹殘炙冷磨滅三河年少
氣獵獵徹裘風緊到此地萍蹤方穩廿載識韓今已遂把
今年除了心還肯此閒樂忘鄉井後堂絲竹喧闐甚轉

眼處陽春已到拌將痛飲但使年年常此夜那用撥灰書
悶絕不似亂山孤枕畢竟難忘惟結習繫殘宵還把長纓
請倘爲我須臾等

秋霽

立春後一日有感

昨夜春來正漠漠寒原新意將滿樹欲無聲山如凝思一
綫逗來平遠風情都軟玉簫吹得簾櫳煖更窅窅捲作幾
絲微雨隔池晚 屈指往日試歲筵前幾人同將紅燭彈
短怕愁來花闌快掩百般開落誰重管一冊南華開更卷
此日猛省任拋萬文游絲可能將我舊情牽轉

豐樂樓

聞龔梓樹攜室之河南詞以寄意

故人巨卿頓首少卿無恙也記一揖西蠡河頭紅燈綠酒

相返待罨畫雪消時候六旬老母登堂拜更多少少年情
性酒酣叱咤 座有瑯琊老子嬰鑠黃皮縛袴覓暇日謀
歡劇飲捲簾山色如畫畏花驚輕敲檀板聽曲誤潛書羅
帕霎時閒劉夢西風半空吹下 我因向楚君贅歸秦六
年離別話聞君又別京華辭舊侶挈着數口飄零走成皋
野少室峰高陸渾山紫黃雲亂草多今古更天際一綫黃
河掛洛陽似錦料知到日看花衣上塵土堪卸 君今得
所僕亦還鄉奈離愁結綺難寫是幾處酒場吟地月榭風
亭似夢如塵經過便怕當年落魄頭蒙敗絮身被短褐非
足下綈袍戀戀何人者伏惟善保千金有日相逢袖重把

蘇幕遮

雪初晴簾正捲未試春燈先把春衣澣第一番風須放輒
怯怯春魂萬一驚他轉 飲厭厭歌緩緩猛地思量春近
家鄉遠細粟柳芽枝上滿待爾抽長把我離愁縮

沁園春

壬辰生日自壽時年二十四

蒼蒼者天生余何爲令人慨慷歎其年難及丁時已過一
寒至此辛味都嘗似水才名如烟好夢斷盡黃蘗苦筍腸
臨風歎只六旬老母苦節宜償 男兒墮地堪傷怪二十
何來鏡裏霜況笑人寂寂鄧曾拜袞所居赫赫周已稱郎
壽豈人爭才非爾福天意兼之忌酒狂當杯想想五湖三
畝是我行藏

瑞龍吟

人日登高寄左二仲甫

扶頭醉門外似水香車將愁碾碎可憐短短春衫禁他幾
度酒痕全漬 今朝事喚取細馬登山作安仁記還向極
浦重尋去年灑淚傷春舊地 一歲登高幾次今朝合了
重陽爲二秋盡何似春初兩般滋味春將愁到甚處可回
避淒涼極雁後難歸花前有思況楚天迢遞故人誰把草
堂詩寄情驛邊歸使口寄了梅花當平安字只愁到日再
無來騎

金縷曲

觀劇時演林冲夜奔

姑妄言之矣又何論衣冠優孟子虛亡是雪夜竄身荆棘
裏誰問頭顱豹子也曾望封侯萬里不到傷心無淚灑灑
平泉那肯因妻子惹我髮衝冠起 飛揚跋扈何能爾只

年時逢場心性幾番不似多少纏綿兒女恨廿以年前如
此今有恨英雄而已話到從頭恩怨處待相持一慟緣伊
死堪笑否戲之耳

前調 岳墳和韻

一吼燕雲裂猛回頭黑罡風起大旗吹折萬里長城憑汝
壞可念兩宮頭白把錦樣中原輕擲三字獄成和議定又
墳前閱過騎驢客黃龍恨不堪說 陰森宰樹松邪柏覓
多時枝枝南向一枝無北眼見玉津歌吹地露冷音塵都
歇此處有豐碑矗矗地下定逢于少保話南朝天子生還
得千年血土花碧

湘春夜月 上元太平使院登府子城

漫登高此閒不像今宵望去數點紅燈歷落逗林梢淺淺
幾家門巷便幾聲笑語聽也無聊有別家年少空牆徒倚
吹起寒簫紅橋舊路曾隨翠轂拾過銀翹不是難甘岑
寂奈風情漸減轉覺蕭颯夢隨塵散踏歌聲隱隱千霄三
五月算今年初度照他細草已種愁苗

謁金門

春寒中酒也半些無用城上蒼山看似夢風淒山欲動
一曲小池烟凍一樹野梅香送折到膽瓶添水供水寒花
骨痛

梅花引

客病

恹恹悶沈沈病寓樓深閉誰相訊冷多時煖多時可憐冷

煖於今只自知 一身常寄愁難寄
獨夜淒涼何限事住
難畱去誰收問君如此天涯愁麼愁

摸魚兒 登滕王閣

幾何時詞人帝子消沈一樣如許
西山眉黛還依舊蹙過
幾回歌舞君更數在此地憑闌
幾箇人龍虎前賢底苦把
一序當筵浮名些子占盡不教與
徘徊久漸見月明南
浦帆檣亂落如雨眼前是景堪
供嘯多了津亭吏鼓君認
取此地是番禺百越雄門戶
登高四顧歎多少興亡酒滔
章貢流得此愁去

生查子

笙歌沸地時
驀被風吹住
相顧各披衣
門外東西路
月

落又烏啼後約知何處帶得舊愁來換得新愁去

石州慢 十六夜雨

背手巡牀不到黃昏窗兒便黑無聊無賴雨聲催過傳柑
時節江城今夜不知冷院重門鎖深幾箇銷魂客端的不
成眠在心窩兒滴 愁極如此春宵可能再說千金一刻
纔見梅花便妒者還了得謝家兄弟縱有好句池塘夢兒
可也難尋覓明日認遙山想巒峰俱失

木蘭花慢 十八夜對月

月高才丈五城頭上鼓淵淵道今夜收燈半城猶照剩管
殘絃爲問鏡兒那角被蝦蟆銜去落誰邊斷送一年元夜
此時有恨嬋娟 看來清淚總如鉛不是不重圓問此情

何似曲終錦瑟客散華筵只此曹騰過去算半生何事不堪憐相對啁啾宿鳥惹人添倍無眠

小重山

一掬滄溟瀉酒杯□□漚數點是蓬萊道人長揖自何來
低聲道海上看山回 怪事莫驚猜那時精衛石漸成堆
幾多鯨鯨氣如灰人閒恨無力可相排

茶瓶兒

歸雁

雁兒恩恩歸去早春萬里陽關開好關外征人老一齊回
首帶得書來了 雪盡江南歸路杳畱幾處沙痕雪爪莫
道浮生巧時南時北只爲炎涼惱

沁園春

題邵二雲姚江歸棹圖

有客朝來與發滄洲飄然一航問四明業業故山無恙姚
江綠綠此水何長古有狂奴後來狂客揖讓其間總不妨
君休笑算幾人到此煞費商量 鳳池奪我庸傷有浦上
秋風舊草堂所居地名秋風浦 況傳家易在緝而再注故侯瓜好
熟矣堪嘗其果行耶樂寧有是只惜蒼生望一場披圖羨
羨名山歲月到手差強

謝池春慢

戒飲

酒腸全窄口說也增煩惱記得盡歡時半載西泠道醉後
眠花塢醉醒啼山鳥主還賓昏更曉一杯到手百事都忘
了 □□□□懨懨息岑岑腦舊緒提難起瘦骨吹堪倒
淚爲聽歌盡戶到逢場小畱身在捐杯好麴生長謝與爾

緣偏少

最高樓

樓上憶意態忒分明花照眼月關情遠詞已託微波寄曉
雲休傍別峰橫牽羅袂揩淚眼可憐生 留下了許多珍
重語分下了一天離別苦山水驛短長亭馬經舊地嘶芳
草雁和殘夢落層城其淒涼俱老大各飄零

虞美人

落梅

枝頭桃柳春將闌趁此抽身早今宵有夢待尋君只恐花
前消盡更無魂 黃昏庭院誰相問一次傷春信冷風飄
動五更愁化作半輪殘月掛羅浮

買陂塘

登白紵山

冷清清荒臺敗瓦日斜來弔宣武如雲賓從當年事對面
青山歌舞飛蓋舉下擁著蝟鬚石眼人如虎南州雄據笑
作賊恩恩更何情緒來願曲中誤 休相笑尙解登山作
賦此兒還有佳處一時裙屐原瀟灑誰料轉頭黃土江月
苦把一片歌聲悄悄沈將去雄心認取聽漠漠蒼林非絲
非竹打起佛樓鼓

鵲踏枝

落梅和稚存

怪道夜窗虛似水月在空枝春在空香裏一片入杯撩不
起風前細飲相思味 冷落空牆猶徙倚者是人閒第一
埋愁地占得百花頭上死人生可也當如此

莫怨妒花風雨浪送我泥深了卻冰霜障身後繁華千萬

狀苦心現出無生相 隱約綠紗窗未亮似有魂來小揭
冰綃帳報道感君憐一晌明朝掃我孤山葬

前調

春燕

挑菜湔裙猶草草近海樓臺燕子飛飛早連日峭寒花放
少倩他絮與春知道 休說置身高處好等託簷閒莫漫
輕相笑社屋白楊人共老春風轉眼秋風到

前調

鷓鴣

管甚行人行不得誰是哥哥慢喚生疏客只許隔花啼磔
磔啼時又惹天如墨 敗葉遮身休歎息有地孤飛莫問
江南北前度詩人頭已白黃陵廟外逢寒食

前調

百舌

偏是春來干汝事報向林閒聒耳何時已叫入五更忙欲
死請君一飲黃梅水 顧盼自知憐紺尾百種新聲舌底
瀾翻起縱使學成些子是半生只爲人忙耳

水龍吟

寒夜披名山圖獨飲陶然竟醉

一杯看遍名山空廚籌盡深宵火某山某水一邱一壑曾
行會坐小有登臨憂生感逝百般難妥喚山靈語汝此閒
好處百年後畱埋我 莫說他年朽骨只誅茆幾時纔果
胸中五岳須將長劔剗平方可誰耐將身死兒女手作僵
蠶臥待向平事了頭童齒豁尙能游麼

春夏兩相期

晦日風雨

春寒甚蕭條旅况今朝小盡都忘堪憎彌空石燕撲穿花

障雨絲抽得柳芽長草色黏來溪流漲最是難聽夜深風
急鬼車南向 送窮難送窮相願年年伴著窮神無恙□
□□□□□□□□□□幾人花裏閉門居誰家燭底低聲
唱爲算今年二分春剩再休輕放

眞珠簾

花朝雨

春陰潑墨人愁坐把雨絲牽下春雲如磨千束芳心昨夜
鼓聲搗破安得錦衾裁百幅左右擁百花同臥避過者蜂
攢蝶簇雨顛風簸 莫道護花難安只惆寒悵煖春都難
作且趁是初生理隔年功課闌內自憑儂照管外屬與金
鈴犬邏知麼漸清江綠漲待伊紅沈

貂裘換酒

題萬黍維持籌讀律圖

那得金如屋把人閒異書全購名流都蓄欲覓錢刀須作
賈休管儋何名目奈心計顛毛般禿更問竹書三尺底夜
深時多少錢神哭蕭何律須勤讀 先生此計思眞熟問
蒼蒼有才如此賦窮何酷阿堵且難求便得大願幾時方
足總輸與容容之福莫向五湖精力盡把致君堯舜功名
祝一任爾餐珠玉

行香子

曲唱涼州曲唱伊州送征人萬里邊愁車輪一轉都望封
侯總不知春不知夏不知秋 一劍猶畱雙淚難收鐵衣
穿盡海西頭舊時同伴鬼哭啾啾也有耶孃有妻子有田

疇

少年遊

初四夜見月

碧天無際暮烟收
新月苦凝眸
一曲如舟
纖雲作槳
載下古今愁
看看望斷
遠山頭
須上最高樓
急喚媧皇將他
鍊就拌著不圓休

滿庭芳

題下瓊籤喚來青使
邀他仙侶
神州今宵會
早新賀玉成樓
約得羿妃同駕
笑冰輪漫似銀蚪
招手語聞風近也待
爾碧雲頭
雲璈纔奏罷
研光舞歇無限新愁
道巨鼇釣去海欲西流
正擬乘風歸也奈三山破碎
難畱還羨爾白頭
戴勝穴處得優游

六州歌頭

愁

從來此物理葬幾書生提使起追偏遠視無形聽無聲百
計難迴避和著夢隨他醒攙著淚催他病不分明纔說人
言我欲先闌入清鏡無情便春花秋月如在霧中經略怕
飛觥也難傾 或來如陣索如負重如障固如城盧號莫
湖稱莫四誰名九誰名一事差堪取遇秋士始逢迎隨宋
玉交吳質友張衡倘是儉才僧父休相覷雅昧平生任江
河日下瀉不到滄溟卻也堪憎

應天長

題稚存小照

夢夢天正睡怪靜夜誰來盜他清氣廓廓落落著手蔚藍
光膩一鉤殘魄死是小劫前身堪記仙梵起卻被天風斷
續吹細 何人能到此算此閒惟君尙堪位置換了狂奴

便有幾行清淚無邊飛動意切莫問人間何世還放爾腳
底青峰出箇頭地

卜算子慢 姑孰春感

過年樣日居斗大城閒看好春如駛極目平蕪直恁冷清
清地詎南州如此成佳麗怎覓出一輛香車□□半行遊
騎 若問當年事有四姓衣冠千門羅綺一片斜陽收了
傾城名士爲傷春添出興亡意且錦被蒙頭睡過□禁烟
天氣

風流子 送黍維歸宜興

桃花浮一片雙槳急江水去何長算對泣楚囚聚原無益
戀羣小鳥別又堪傷消魂極新知俱失路送客是他鄉十

雨九風春人俱去一亭兩榭花月俱荒
鴉啼青山曉離
堂酒盡殘燭黯無光屈指自今以往此夕難忘只來日大
難憂貧憂病前途宜慎時煖時涼折得可離盈把助汝行
裝

念奴嬌

清明偕容甫稚存訪城東古院

蒼城一角被長林古寺襯來如畫客子入門風習習松是
一千年者石徑蝸涎佛頭鳥糞鼠竄飄簷瓦閒花滿地舊
愁無限縈惹 不合攜手登樓遠山常笑我春魂未化三
兩兒童相趁逐也算少年遊冶小有登臨不成時節添了
離人話只疑是夢未知此會真假

前調

送容甫歸真州

思親遠夢記連宵夜雨一燈分作羨爾思歸歸卽得飄若
浮雲先去客本非家聚原有散但怪如斯遠一鞭捎過勞
勞亭子邊路 今日世態波濤才名瓦礫無我疏狂處待
有五湖三畝宅多恐萱幃遲暮歸旣難歸客還送客觸起
悲秋緒一言墮淚不知何地重遇

小重山

壬辰三月晦日新安客舍

整整春光客底逢

是年元日立春

人隨波上下絮西東鶯啼草長

雨濛濛花事盡添倍暮城空 門巷落英中幾番尋不見
舊時蹤餞春筵散太恩恩簾捲處三十六遙峰

減蘭

黃梅

雨顛風駛催得梅如金彈子小摘吳娘未忍沾牙只嗅香

懊儂情緒怕唱方回腸斷句半晌徘徊聞道湖州刺史
來

南浦 寄仇一鷗

一鷗無恙記烟波浩蕩舊盟深貪看蒼梧雲去五載斷瑤
音儘把六橋三竺好湖山一一讓君吟況酒徒座上有人
宿草說着總寒心

請勞濂叔
蔣思睿

負汝窮途一諾奈空囊羞

澀到如今拌把鬢毛絲盡無處換黃金聊倩南飛一雁告
別來思淚滿離襟問臨江樓上那時醉墨可能尋

柳初新 七月初二日夜宴

雨聲滴碎梧桐院早是悲秋病券無端乙夜哀絲豪肉激
得異鄉愁斷更被澆腸熱酒水犀般將愁分半 一半香

溫褥軟前遊，隔得如天遠。哀多於樂，醒常如醉，半爲綺年。
難挽，待灑淚珠成串，怕驚他四筵。酬勸。

千秋歲

二喬宅

旁有井水，常作胭脂色。

傾城俊傑流韻，江東壁空腹痛。西陵客玲瓏，齊解佩，照耀
分聯璧。誰不羨一門佳婿，東風力。並倚攤書策，舊地餘
荒宅。風雨暗莓苔，碧土消蘭麝，氣井汲。胭脂色，曾染出南
朝。千載生香國。

一叢花

懷寧道中

小黃茅店睡初酣，風力透蘆簾。馬嘶人起，恹恹甚，正驚我
歸夢江南。一夜輕寒，五更殘月，閣住遠山尖。微哦依舊
下車檐。酒面怕霜醃，才情薄，負渾多事。漂泊苦久，更難堪。

孤負心盟凋殘身世流淚滿征衫

春風裊娜

中秋夜使院對月

被冰輪入戶喚起無聊蘭炷減篆香消悵平分秋色露和
人瘦細搖花影夢與簾飄寡女絲虛霜娥鬢冷肯枉空齋
絮寂寥樹底捉金菴客去天邊駕彩鳳人遙空自兩手
又擎雙肩聳削閒題句糜費芭蕉愁萬疊淚雙交盈階蟬
蟀半壁蠨蛸急管三更彌空作陣繚垣一曲畫地成牢此
時幾箇在好闌干畔低低私祝歲歲今宵

踏莎行

十六夜憶內

珠斗斜擎雲羅淺熨蟾盤偷減分之一重逢又是一年看
明年看否誰人必今夜蘭闥癡兒嬌女那知阿母銷魂

極擬將歸棹趁秋江秋江又近潮生日

兩當軒集卷第十八

兩當軒集卷第十九

武進黃景仁著

詩餘七十四首補遺二首

玉燭新

影兒何處覓剩空館餘香綠苔行跡曉風殘月關山路應
減昔時薌澤如許腰肢怕掌上少人憐惜可念我思淚朝
朝搵爛吳綃幾尺多時客館相偎把錦被濃薰芴筭親
擘檀槽撥到剛私語忽地當曾一畫看花易老況又作花
閒過客拌憔悴換得瀕行眼波輕擲

薄倖

斜披氈笠耐西風獵獵吹急遞一陣深樾虎氣驢耳雙雙

都立轉平岡細草黏空誰添幾點牛羊入記來往南山重
逢此景閒煞黃皮袴褶顧瘦影沈吟罷清淚漬草根都
溼詎茫茫大地竟無歸處此閒卻灑楊朱泣且休嗚咽算
途遙日暮今宵可趁郵亭及土壁繩牀料是百憂橫集

喜遷鶯

皖城懷古

荒城一曲想碧眼孫郎臨濠擁燾赤壁燒餘濡須戰罷此
地彈丸誰屬莫道廬江重鎮況是皖田如玉三軍奮聽一
聲萬歲堞樓齊覆攻速記是役陳先_漢爭先端仗升城督
夾石兵收潯陽寇翦費了幾堆斷說千年王氣到眼
幾行殘局和盤算歎江流遺恨孫劉未睦

菩薩蠻

秋海棠

頽垣缺甃，胭脂色斷腸。花對銷魂客，小樣卻中看帶來些。
子酸。從今愁薄，福爲負，傾城目。辛苦繫紅絲，暮秋逢嫁
期。

好事近

阻風江口

一霎起驚蕪，我與浪花頭白。占得鷺鷥拳處，看楚天秋色。
回風低送鼓聲，搥前灣有舟泊。少頃亂帆來也，奈去船
無隻。

步蟾宮

一層丁字簾兒底，只繡著花兒不理。別來難道改心腸，便
話也有頭沒尾。蘭膏半滅，衾如水，陡省是夢中情事可。
憐夢又不分明，怎得箇重新做起。

滿江紅

吳大帝廟

伯也無年把草草江東付爾不數載西連北拒公然帝矣
彼國有人難逕渡諸君爲將偏甘死只幾封降表落中原
生平恥垂珠冕翹華履睛點碧髻掀紫問生兒誰道不
應如是半壁江山成夜火一生事業憑春水小朝廷血食
尙千秋誰能此

醜奴兒令

潁州西湖半沒爲田矣

聚星堂上人何處一換揚州一換杭州碎割西湖十頃秋
千年魂魄重來此高處眠牛低處藏鷗便是蓬萊清淺
流

鳳凰臺上憶吹簫

七夕舟發練江諸同人送于紫陽橋上風雨猝至匿舟橋下不

得出送者亦散去排悶爲此

天上團團人閒離別一般徙倚長橋詎填成鳥鵲直恁魂
銷其下潑翻銀漢如箭駛征舸似有語聲天半翹首見雙
袖齊招招手處九天咳唾別淚同拋 停橈風雨驟乍驅
來入穴不辨呼號似尾生柱朽豫讓聲消歲歲洗車舊例
爲征人移在今朝猶隱隱數聲珍重飄落雲霄

高陽臺

自湧金門至柳浪聞鶯遇雨

問水亭邊湧金門外三錢穩趁湖船自我來思于今又是
三年敗荷衰柳垂垂盡似渠儂一樣堪憐更無端冷雨敲
篷添倍淒然 扁舟悄艤蘋花岸喚舟人小坐卻話從前
見說當壚于今尙記逋錢兩峰不放修眉看爲傷心鎖合

湖烟且歸眠淚是愁人雨是愁天

買陂塘

過聚景園舊址

怪行行東湖一角淒烟怨水如許舊是趙家行樂地那覓
綺樓朱戶君試數剩幾點流螢照打官蛙鼓草蛩低訴又
垣粉零香階瑤腐碧歲歲葬秋雨湖山路不是幾番今
古樓臺塞破烟霧荷灣柳港知多少三兩漁舸占取菱唱
苦向斜日橫塘窈窈聽將去野花無數尙著露含風年年
開向會駐翠華處

青玉案

泛舟丁家山下

湖天漠漠陰晴半雙槳急湖雲亂雲到峰腰船泊岸水蓮
花謝木蓮花放沒箇人來看回頭拍拍飛鳧散隔岸猶

挑酒家幔莫爲聽歌腸欲斷有情天地無邊風月不與閒人算

江南好

西湖好十頃碧悠悠有怨只澆蘇小骨無情不上范蠡舟
斷送幾人愁

西湖好恨事古今無邀得官家猶北顧未曾亡國是西湖
唐突怨僮奴

菩薩蠻

暮遊湖山神廟

分明有蝶孤飛去轉過庭梢無覓處悄步向花前掃花人
正眠 獨立成惆悵更上湖樓望湖上雨吹來看花人盡

回

水慢聲

宿聽水亭

昨夜睡鄉真妥慣年來水宿生涯拍枕琤琮連牀嗚咽隔
牆外訴盡幽懷醉情漠漠耐聲聲柔櫓相捱只有夢兒飛
不透烟波成陣鷗鷺與徘徊不是貪眠非關病渴水鄉
深處小住亦爲佳君看十頃碧一明如鏡剛有薄雲如絮
來往相揩雙槳休拏半篙輕試和怨一齊埋還借取峰頭
雨意遮住采蓮娃

一叢花

花朝

不成供養不成筵爲爾禮金仙衆香國裏休回首要重來
何事生天羯鼓頻搥并刀快翦判取一生緣好春剛半
月剛圓此景最堪憐人生若使當今日便百歲也是中年

綵筆前身紅塵去路閱世總如烟

金縷曲

次韻贈劔潭

數語容疏放算神交大江南北十年相望試問一江東去
水誰似此情難量怎相見轉成惆悵半世顛狂誰念我覓
酒壚酣睡陶家葬西園梗同飄蕩直須位爾青霞上耐
些時衝寒閣雪梅花情況結習未除猶綺語便得瘦腰何
恙勤剝啄綠陰門巷一片竹西歌吹裏伴枯桐守住維摩
帳君試撫衆山響

前調

酒後呈友人再疊前韻

莫把悲歌放倚台垣一星司命熒熒相望狂到一分窮得
倍半黍肯差衡量惹我輩坐愁行悵願借一鋤乾淨土取

十年詞賦深深葬否卽付秦灰蕩
幾人笑我層城上把
茫茫塵沙下士等閒相況自見蓬萊清淺後誰保鬢絲無
恙海水立一條如巷便踏白龜從此去喚陽春小揭東皇
帳敲赤日玻璃響

前調

楊西禾招遊小秦淮三疊前韻

急買扁舟放記隋家玉欄珠楯參差盈望亡國未關行樂
事莫把此兒輕量總付與夕陽惆悵一片景華宮下土有
深宵十斛秋螢葬光照見香魂蕩
故人醉我荷香上倩
多情二分明月伴人清況南部繁華猶未減漸報烟花多
恙且歸去踏歌深巷詞客揚州同落拓問誰先夢覺梅花
帳吹鶴背笛聲響

前調 送孫淵如歸里且訂白門之遊四疊前韻

忍便歸橈放不多時廣陵花月客中吟望除是邗江嗚咽
水省識此愁無量問底事臨風悵悵不信輒紅塵塚裏把
珠光劍氣常埋葬滿六合悲心蕩 憑君寄語高堂上抵
千金平安兩字邇年遊況鐵甕江聲京口樹依舊布帆無
恙記後約烏衣門巷一揖六朝殘照下又天涯聽雨聯秋
帳更對策摩雲響

水調歌頭 題明春巖圖照

爲問綠楊岸幾日漲痕添先生釣本非釣坐愛此澄潭不
羨羊裘大澤那用綠簑西塞一領水紋衫風過忽飄舉意
態絕清酣 論家世高柴戟盛纓簪袖中活國雙手先把

釣竿拈便有五陵裘馬何似五湖烟水此味幾人諳掩卷
莫重憶惹我夢江南

青玉案

題金酉書吟紅藥圖

烏絲界破箋兒鳳芳意閣春愁中一縷茶烟凝不動花光
半面衣香一桁約得吟襟重知君未是閒嘲弄如此華
年了非夢茗椀筆牀疏不空美人香草名花傾國淡薄文
人供

滿江紅

題高佩之圖照

大袖疏襟憑管領秣陵秋色省古貌鬚髯尺五羲皇標格
三徑祇餘猶子守半生悔作諸侯客檢青箱和笑喚孫前
經橫膝淮水上絲歌咽冶城畔車塵熱住繁華窟裏寂

寥揚宅肯讀便成佳子弟看山可放閒蹤跡待他年風景
按圖中來尋覓

珍珠簾

雪夜懷蔣耘莊青陽

一燈孤幌青無色坐聽竹聲都寂擁鼻正微哦奈亂愁千
結窗內紅爐窗外雪只一紙寒溫便隔□□况懷人天際
關嶺重疊念爾回首無家祇隨身弱季依依作客絮語
夜闌時問可曾眠得瘦損腰圍多病後詎損了江湖綵筆
相憶倘有句裁成寄南飛翼

湘月

春夜

犀簾爛盡問深宵幾回枕上彈指生慣春愁怎昔日不到
愁心如此幾陣風時數聲雨後心碎如窗紙睡鄉纔穩隔

花鐘又敲起 試算大地茫茫斷無春到只有霜毛裏莫
問尋歡便好夢不許而今重理病沒人知寒無人問守得
衾成水銷魂尙可更無魂可銷矣

賀新涼

壽州遇桐城吳竹亭丈話舊因及甲申歲
常州知府潘峩溪先生試童子拔子第一

丈卽先生中表也先生後作浙江寧紹台道卒於
官

往事爲翁數記當日詞場跳盪猛於乳虎正值憐才潘騎
省籍甚衆中一顧把江夏無雙見許是日論文翁在座費
三條紅燭三搥鼓感此意極辛苦而今同賦淮南樹且
聯牀十年愁話一燈分訴聞說東山絲竹盡誰慟西州門
路翁矍鑠依然如故怪我早衰蒲柳質問生年那得常三
五慚愧煞受恩處

沁園春

題程仲南印譜卽索刻小印

刻石鼓詩勒燕然銘姑從緩圖向雖彝寔豆尋些事業銅
斑玉血墜出膏腴莫恤譏彈何妨篆刻世上由來幾壯夫
人間事被幾番鐘鼎換盡蟲魚一言翁定胡盧肯爲試
剗天妙手無問書同雅點姓名誰識文惟醬覆印信何須
我爲翁言翁誠許我我當靈威赤虎符臂此去辟山精跳
敵路鬼揶揄

南鄉子

秋夜寄懷維衍

生怕數秋更況復秋聲徹夜驚第一雁聲聽不得纔聽又
是秋蛩第一聲 淒斷夢回程冷雨愁花伴小庭遙想故
人千里外關情一樣疏窗一樣燈

踏莎美人

發壽陽

背郭依山投村向驛古原何限勞勞客夕陽秋思正清酣
坐對數行秋樹古淮南 帳飲還醺衣塵漸染送人只有
清淮遠幾堆殘戍幾家村當日錦帆行樂是何人

琵琶仙

留別孫吟秋程雲槎

綠酒紅燈剛遣卻蕭索九秋風景又早白雁聲聲離程被
攢緊是解得別原未免再一晌流連便怎花替人愁酒供
人淚幽恨誰省 問何苦么絃澗洞把如此歡場變悽哽
縱有金壺汁瀉奈此情難盡試壯語神仙將相和錯刀留
贈公等拌取爛醉離觴一程程醒

江神子

顛提裙衩步蒼苔首驚回甚時來昨宵花底風露爲誰捱
念我一番寒澈骨分半角錦衾偎

端相一霎太津津乍微嗔卻回身人閒天上此景最消魂
我戀卿卿卿自會卿戀我是何因

風流子

懷錢三夢雲滁州

去年當此日秋城內傳語秀才康卻南巷逢君短衣縛袴
西泠載我素舸輕裝相將去登山傾一慟入市倒千觴詞
客生平大都蕭瑟酒徒散後兩地顛狂 環滁皆山色朝
朝畫閣掩映新妝可念舊時游伴添鬢蒼蒼記鄂舟雨夜
同眠繡被彭城佛寺相贈檳榔莫話十年前事倍惹淒涼

念奴嬌

渡江至京口

銅琶鐵板問何人解唱大江東去如此山川才稱得一箇
寄奴家住花月茫茫魚龍混混淘洗英雄處金焦兩點爲
誰閱盡朝暮卻好南倚金閶北連淮海劃斷繁華路我
渡此江凡幾遍自對夕陽低數送客依依笑人鹿鹿不少
閒鷗鷺卸帆京口聲聲萬歲樓鼓

催雪

懷遠舟夜憶內

爲語長年前途暝色莫犯支祈神怒向漁火叢中將毋小
住擁鼻待賦懷人翦燈風又在篷疏處一船離恨一腔思
淚付淮流去夢斷蘭閨路對古國塗山荒祠啟母爲問
娶塗人別家何處天地平成猶易只此恨綿綿終莫補蕭
蕭雨拍枕波聲似有英靈來訴

沁園春

王述菴先生齋頭消寒夜譙卽席賦呈二首

讀萬卷書從十年征歸來策勛有聞名破膽白狼青微望
風檣纒熒女髯君黔蜀烽銷西南埃一脫劍仍歸鷓鷯羣
承明暇拉一時燕許置酒論文 長安車馬紛紛只左擁
尊彝右典墳算才選得福文昌司命知能兼勇司馬行軍
絕域功名

熙朝柱石天下蒼生望雨雲書生意感牛心分炙白練題
裙

久客京華落拓無成哈吁暮朝歎名場已醒夢中蕉鹿酒
徒難覓市上荆高冰柱如山雪花比席昨夜征衣換濁醪
塵土外但西山一角冷翠迢迢 朝來寒竟須消怪賤子

何當折柬招卻幾層幕底歌圓似豆一重門外風利于刀
顧曲心情當場意氣今日逢公頗自豪明朝事任紇干雀
凍鵲旦蟲號

齊天樂

題朱澧泉夢游圖

玉華久斷層城路被君夜魂飛透枕倚遊仙臺經靈夢樓
上有人垂手分花拂柳乍獻果猿驚銜芝鹿走一笑相逢
可憐宵裏那時候依稀琴韻數弄露涼風細處按節輕
奏衣上香多袖中雲在不似人間星斗此鄉真有便花月
精靈儘難消受烟外霜鐘一聲聲聽取

換巢鸞鳳

王述菴先生招集陶然亭

素景商颿正羈懷落漠病思蕭寥忽飛天外賞來赴酒邊

招羣公車蓋滿亭皋文雄談綺書狂飲豪非此會可不負
鳳城秋好 清眺山容悄偏愛秋山耐得斜陽照對酒能
歌拈花解笑未損年時懷抱吟情孤嫋驀停杯長天看得
征鴻小歸鞍遲鞚角聲催度林杪

湘春夜月

竹簾同蓉裳賦

是何人生生擘碎湘雲掩映綺閣銀櫳漠漠漾波紋界上
一絲絲月又幾絲花氣約住爐薰任輒紅十丈此閒清絕
不到纖塵 昔遊還記黃陵廟外青草湖濱細認綠烟一
段有未枯怨血不斷離魂晝長率地看模糊猶帶烟痕斜
捲處把冰紋簾展楚詞讀罷如見湘君

邁陂塘

蝙蝠

到黃昏廊虛屋古和烟條忽飛動佛樓山館時來去捐破
晚風一弄穿畫棟休攪亂香窩燕子尋花夢名經鑿空怪
鳥鼠都非羽毛難別生不屬麟鳳 神仙種何必淮南丹
汞羞他雞犬相共寄人簷下須臾事且耐冷嘲閒諷尋古
洞聞說有松脂石乳烟霞供人間無用便老爾千年明砂
拋盡不值一錢重

石州慢

蒲扇

澤畔苻離妙手拈來製成風翼愛他涼沁露葉平鋪烟條
細摺聚頭新樣倘將巧思翻來模糊綠認春帆葉堪笑牧
豬兒把陳編空緝 妥帖箇是吳儂水鄉風味舊曾諳習
任說團蕉鏤竹一清難及甄妃善感便教塘上吟成秋風

不效班姬泣莞蕩展方花其波紋重疊

水調歌頭

題王蘭泉先生三柳漁莊圖

一幅好東絹烟水煞空濛先生曾讀書處差許輞川同閒
覓釣師畱友共飽金齏玉鱠樂事總無窮三面寫晴柳九
朵削遙峰 營門外馬背上直廬中時時一展圖畫歸興
滿吳淞已是文章千古又待功名萬里何暇思秋風魚鳥
莫相憶此意在天公

東風第一枝

送錢獻之之西安

易水風寒幽州日淡誰教我輩遊此君行忒恁恁去醉
古長安市茫茫身世那禁得幾番不是放空囊老鐵成虹
添得關門氣紫 杯酒外離愁似海攜手處月華如水不

知秋爲誰深豈意別從今始經過壁壘問成名幾多豎子
更咸陽一炬秦餘可有蝨魚乾死

醉太平

夏夜聞鄰院歌聲

庭陰綠莎牆頭翠蘿照人迢遞星河忽誰家皓歌 華心
暗磨歡場夢過不聽時也愁多沉聽時奈何

燈前眼波尊前頰渦也會題遍香羅喚當筵唱過 紅兒
玉娥花娘麗哥半生清淚如波爲伊曹費多

江城綺羅遷鶯鬧蛾聲聲攙著聾婆被輕風遞過 中年
感多人生幾何便教徹夜清歌問伊家怎麼

買陂塘

歸鴉同蓉裳少雲作

倚柴門晚天無際昏鴉歸影如織分明小幅倪迂畫點上

米家顛墨看不得帶一片斜陽萬古傷心色暮寒蕭淅似
捲得風來還兼雨過催送小樓黑 曾相識誰傍朱門貴
宅上林誰更栖息郎君柘彈休拋灑我是歸飛倦翮飛暫
歇卻好趁江船小坐秋帆側啼還啞啞笑畫角聲中暝烟
堆裏多少未歸客

飛雪滿羣山 冰花

水欲凝時風還蹙住偶然五出成紋開原頃刻色香何許
可知泡幻前因空花先現處是姹紫嫣紅後身髣髴看取
幾絲宮繭隨翦落紛紛 應自笑傾陽無分也借霜姿一
點雪豔三分鏡菱初展瓶梅欲坼一般冷意相侵鏤成都
遍肖卻輸與文章有神不愁漂泊春風古澗尋斷魂

燭影搖紅 燈花

驀地凝眸蟬紗減卻銀釭亮嫋成蘭氣不多些幻出花花
相深掩珠屏斗帳莫教他一絲風颺金錢罷擲碁子停敲
剪刀輕放 莫是明朝青鸞有信堪凝望只愁今夜似前
宵刻意將人誑憎絕侍兒憨樣報聲聲妝臺斜傍且挑香
穗書就桃箋寄伊惆悵

雨中花慢 不寐

坐夜如年將宵作晝不知是底心情怪愁偏黯淡影最分
明又是一絲涼雨和風捲入疏櫺口真淒絕夢都拋我忒
可憐生 屏空屋古骨冷神清階前葉墮還驚誰省識拋
乾鉛淚溼遍桃笙偏是黃雞睡穩滴殘花漏無聲再休相

笑空堂燕蝠各有生平

醉花陰

夏夜

烟外鐘聲飄數杵風過涼生苦隔竹捲珠簾幾个明星切
切如私語滅燭坐沈香一縷悵好閒庭戶和淚囑流螢
莫近蓮塘照見雙棲羽

洞庭春色

帆影

十葉高懸一痕斜漾慣趁行船過綠蕪野岸還爭燕掠白
蘋深港不礙鷗眠最好夕陽低映處待揩遍秋江一幅箋
輕移去怕風花易卸水葉常偏江樓有人徙倚看不定
檻外簾前更遙黏夜火閃波如電背飛落月貼草疑烟長
是送君南浦後與銷臙離魂共黯然相思夢願從伊飄去

落向郎邊

壺中天慢

柳聲

九門鎖上早蟬更報急淒淒夜永常向漏聲疏處補街鼓
頻番相應古驛銜山荒城抱水幾箇人欹枕欲沈猶未星
星蕭寺鐘殷便擬刁斗千屯胡笳萬帳無此聲悽警獨
火營門青似豆打得霜酸月冷今夜嚴城傳來虎旅一樣
愁清聽可知獨客被他鄉夢敲醒

滿江紅

瓦松

浪得松名借片瓦託根而已也只伴牆蒿城草一般生理
餘氣慣催金碧換劫灰不共鴛鴦死博詞人爭詠昔邪房
香生齒 鴟吻畔魚鱗裏連斷蘚交叢杞怪宮空寢壞爾

曹偏喜似有客樓新雨綠更無僧寺斜陽紫怕深宵發屋
走妖狐齊飛起

沁園春

送安桂浦之廣平

有客長安西笑多時今方作裝向邯鄲古道訪平原客叢
臺落日弔武靈王暇卽登樓豪宜置酒城上山走太行
清狂甚喚娃嬴挾瑟一代名倡 姦雄已事堪傷七十二
遺墳蔓草荒笑此曹作計將毋倭侷吾儕弔古倍覺蒼涼
此去關河大都遼廓匹馬嘶風度濁漳憑君去問仙翁一
枕可熟黃梁

金縷曲

久不獲稱存薇隱書時二子同客姑孰

往事君應省記南州吟聯山騎昔時遊俊今得孫郎應勝

我君自不憂孤另念獨鶴風淒露警

時與稚存有
猿鶴之稱

豈意江

潭寥落後覓一行征雁都無影何久不枉芳訊
縱教懶作長安信也應憐長安市上故人貧病我夢慣隨江上下
那管蛟龍睡醒羨二子相依爲命抵死不沾京洛土算從
頭作計輸公等相憶苦筆難罄

前調

送楊才叔試令甘肅

羨爾抽鞭早把人閒玉堂金馬付之一笑人說用才多錯
迂我說此行偏好便潘令輸伊年少卻怪連宵同按曲早
風前屢犯伊涼調是此日送行稿
長城盡處河流繞更
經心洮湟關隴幾重邊要昔日羌戎皆錦繡試擁專城坐
嘯莫認作功名草草只我送君真有淚爲文章知己如君

少名山約莫忘了

摸魚兒

自題掛樵圖

記曾聽春山伐木丁丁聲度林杪斧聲漸歇歌聲近帶得
夕陽歸了君莫笑我識字無多不解談王道名山難到便
到得山中也愁歧路片語乞相告塵世擾谷口攜家須
早半生惟爾同調人閒無處容長揖愁絕蹇驢席帽休懊
惱判爾許腰身折向伊曹好浮生草草待爛得柯殘夢醒
蕉後相與出塵表

八歸

題吳哲甫湖田書屋圖卽送其歸里

生綃一幅水鄉烟景圖就無限清感山腳平拖湖影綠還
被葑田數稜織成漪簟白板閒扉垂柳處總付與水風開

掩論活計春雨菰蒲秋稅足菱芡 見說吾師別久農經
拋卻誤踏輓紅塵窻簞香引思鷗波入夢茶尾吟邊愁黯
今朝歸計穩小別斯須袂重攬烟波樂莫教句住好憶臨
歧西山眉黛斂

金縷曲

送汪曉山試令江蘇

南國蜚聲價看紛紛同時鸚薦盡居君亞似此才名真第
一合遣輪扶大雅怎百里屈君腰胯一笑宰官身已現問
西清東觀何人者揮手去暫相謝 江城此去真如畫記
前遊五湖烟水一帆曾借鄉郡不分襟帶水親舍便如官
舍我亦庇萬閒之廈他日願隨諸父老聽清琴獻頌棠陰
下相與勸引金竿

念奴嬌 元夜步月

天街放夜看香車寶馬一時流水風過笑聲多處輾吹不
輒紅塵起西域燈輪東京火樹百變魚龍戲萬人開處蠻
王倒跨獅子 誰道有月空中斜飛兔腳圓過今宵矣便
不爲燈須爲月肯放華心竟死影忽疑仙身還是客踏遍
閒坊市乞天從願年年今夜如此

減蘭

彩雲成隊衆裏橫波偏不奈昨夜窗前掩袖迴燈劇可憐
新詞解讀誰道吳兒心似木笑殺兒曹只愛當筵脫錦
袍

菱房含雨冷落相憐心最苦紙閣薰爐一幅春風鬢影圖

別筵易醉酒綠燈紅都是淚雪壓鞭梢回指徬徨第七

條

朝來雪塞徬徠口東草場東第七條顧梁汾句此景適復似之

百字令

宿王介子先生齋頭話舊

荊州初識記霜清憲府天寒夢澤絲竹後堂容我到醉倒
鬣髡十石湘月窺簾岳鐘殷榻半載長沙客楚雲千里回
頭都是陳跡今日金馬還公蹇驢老我相見黃塵陌任
近城南天尺五一水遙通太液藥圃圍棋草堂翦燭話到
東方白殷勤強飯蒼生還望安石

定風波

和余少雲

底因緣席帽黃塵五年人海爲客桂老巖空魚荒水冷兩
地難棲息素衣緇黑頭白臺上黃金慘無色何益待重新

整頓看山雙屐 石歌邊調口爲消愁轉助愁千尺任馬
醫脂販鳴鐘列鼎那覓牛心炙杜陵茅馬卿壁我更無家
可歸得今夕且將鉛淚和伊同滴

貂裘換酒 潞河舟次

行矣吾何憾但西山依依送客相看未厭穩買潞河舟一
葉載去昔時書劍趁滑笏半川倚簾柔櫓一聲塵夢覺任
荒雞促舞三家店分芋事久無驗 新妝不爲投時豔問
幾輩飛騰馬價遭逢狗監漁弟漁兄相待久莫負鰲肥酒
醞臙篋裏宮袍無燄零落江皋原不恨奈浮雲落日光陰
澹從尹卜學鳧泛

清平樂 河間曉發

茅檐土銼著箇淒涼我替戾聲催裝上馱冷雁一繩先過
昨宵翠袖紅絃知他今夜誰邊報道郵籤百二驚回鄉
夢三千

塞垣春

初九夜金棕亭招飲病不克赴詞以柬之

後日春來也遲酒伴將春借梅皴玉蕾釀浮花乳春影如
畫賸薄寒料峭融春冶便結箇嬉春社更紅箋春詞好霎
時傳遍都下頻念苦吟人似未解春來孤負清夜待作
討春遊奈絲騎慵跨戀銀燈翠竿相望春城但愁和燭奴
話畱約聽譙鼓看春將春打

御街行

十三夜借少雲同步燈市

城東昨見青旗轉陡撲面風情輒玉簫吹起試燈人門巷

笑聲烘煖六街拋得月華如練今夜無人管 和君舊是
清遊伴奈往事心頭滿無情一片是春雲隔得兩家天遠
星橋影墮踏歌聲散三嘆歸空館

月華清

十五夜借金椽亭王竹所集少雲法源寺
寓齋因借步燈市

絲麪搓成香蠶煮熟招攜同話松院解事靈妃早擁一輪
天半是今年初度逢圓祝後會一樽常滿行散愛流輝紫
陌分光翠殿 莫道夜蛾心懶被幾陣衣香暗中勾轉似
水車輪不遣車中人見十分清露下歌聲一例俊燈前人
面流玩算年華暢好忍教輕換

摸魚兒

雪夜和少雲時同寓法源寺

怪朝來春陰如許同雲已閣簷際擁爐鴝炭頻番換膚粟

漸平還起禪窟裏本不稱春來雪況紛紛地尋思往事共
燭短更長寒深屋淺話凍玉蟾淚 問家具經卷藥爐而
已可憐青鬢憔悴君貧我更貧兼病愁竟不須迴避高枕
睡倩屋角西山與夢通清氣江鄉風味漸燕筍登盤刀魚
上筯憶著已心醉

前調 疊前韻

倚松寮斜陽澹澹天圍遠樹無際樹頭漸有歸鴉宿又被
暮鐘敲起人海裏只我兩閒人吟占蕭涼地十年來事似
病馬依牆窮爨入檻悽絕轉無淚 春漸半十日九風而
已只愁春也憔悴韶華不向愁邊好它日逢花須避休便
睡共佛火深宵一榻分雲氣禪和滋味歎我已能堪君真

可惜還覓市酤醉

三臺

題亦圍

以下補遺

憶當年蠟屐僊墅傾倒風流如許漫相推年少是僧彌只
意氣慕君同甫連宵過喜聽驚人句鎮幾度海棠疏雨藥
砌畔紫葳蕤生花架上碧鬢髻吐看雲齋時凝煙霧卻種
此君同住灑白練天嬌似驚虬愛寫龍孫舊譜 別來曾

數載蘭陵路都爭識玉川風度平原記紗帽隱囊子山賦
玉杯珠柱羨吳苑小令題詩蘭亭右軍作序把蠻牋成帙
界烏絲更貴洛陽煙楮便插簪散幘成高步闌干外細煮
願渚只今重話名園領畧煙霞如故

見亦
園集

邁陂塘

題湯緯堂吟秋圖

綠陰陰夏初庭院何來秋意如許丹楓黃菊都移到似聽
候蟲無數聲在樹有尺五疏襟約得吟情住問秋來路是
流水煙村夕陽漁網風柳最疏處賢明府十載鳴琴單
父筆牀茶竈家具苔窠石徑尋詩坐剛散竹閒衙鼓吟更
苦任侍史青童竊笑官何故圖中如遇聽閩嶠東西鼇江

上下爭唱使君句

見炙硯
瑣談

兩當軒集卷第十九

兩當軒集卷第二十

武進黃景仁著

族子坤厚輯

遺文

浮湘賦

佚

渡淮賦

佚

與洪稚存書

著作何如出門時會見君研脂握鉛爲香草之什君興已
至不敢置喙但僕殊不願足下以才人終身耳高青邱詩
近日復讀以君會稱其五古故也及細玩之殊爽然失蓋
青邱雖不以五古傳而僕謂勝其樂府七古遠甚味清而
腴字簡以鍊擬古諸章尤佳過此而往欲足下深心閱之

求其用意不用字字意俱用處且更欲足下多讀前人詩於庸庸無奇者思其何以得傳而吾輩嘔出心血傳否未必其故何在

送余伯扶之太原序

伯扶與予聞名十載聚首五年攜家京洛同諧桂玉之艱結客幽燕各有悲歌之伴斜街葉落載酒頻來小市烟橫吹簫並過話兩家之燈火竹屋三間嬉九陌之風花絲韁一握以此相樂詎曰不歡然而抗志青霞每塌秋風之翅委心素翰誰知野火之唵我氣未馴君懷正遠昨者門倚急裝人來古寺依依話別款款言懷老親念子萬金之一紙初開弱季依人千里則獨遊曾慣茲將南去心已逐乎

雁臣先作西行跡尙儕於燕侶蓋月之十五日將之太原
偕令弟少雲歸省焉爾其路出中山燕陲已盡地過石邑
趙境全開由獲鹿以登山自井陘而入險土門一綫當年
之赤幟烟消淨道千重何處之綠蛾羽化廟指媯皇是鍊
石補天之處祠經妒女莫鮮衣炫服而過大都娘子關南
峰皆似劔將軍壘畔石盡成兵荒岡小社賽重虻蚘土屋
深村歌餘蟋蟀此則舊遊如昨可爲君計里而談而別緒
新縈未許我同車而去言念及此能無惘然嗟乎君苗硯
焚江淹才盡壯志已消乎十載虛名誰託乎千秋抽身十
丈塵中君眞健者斂版百官表底我亦可人此日長歌送
客請君題芍藥之箋他年一笑登堂爲我設鱸膾之鮓乾

隆壬寅夏六月

跋林茂之詩

茂之詩錄得一百三首率皆萬曆三十九年辛亥以前與曹能始切磋時作其六朝懷古六首雖不逮能始作要非近人所及按阮亭序掛劍集云康熙甲辰茂之年八十五後以丙午下世據此知茂之生於萬曆七年己卯卒於康熙五年丙午年八十八歲也序又云茂之詩清華省淨具江左之體斯言信非虛美矣

題吳竹橋集

精思乙乙妙理庚庚方絢爛於赤城霞應萬丈倚蕭森於太華雪是千年何人解此有承蓋之小山使我讀之若揚

帆於大海

硯銘

至剛者石至柔者筆以剛受柔維石之德

詩評 七則

杜固詩之祖而李東川實可謂祖所自出後人法門亦遂無所不備篇幅雖少而渾然元氣已成大觀矣

愚見欲以岑嘉州與李昌谷溫飛卿三家彙刻似近無理然能讀之爛熟試令出筆定有絕妙過人處亦惟解人能知之也

阮亭云歐陽文忠公七言長句高處直追昌黎自王介甫輩皆不及也愚謂歐王異派各有佳處不能較優劣也

王詩得辛味居多其沈雄處要不減前人

二鼂宗蘇參黃其沈峻刻鍊處又公然有離立之勢補之篇幅尤大按其勝處竟直入昌黎之奧矣人多謂附蘇而傳詎知有非蘇亦傳者耶

遺山詩學杜兼李天資才力爲後起之勁微嫌其成句少多然不害爲盤盤大手筆也

伯生沈鬱頓挫不肯爲一直筆固是後來之雄但有過爲團刻處一失之運掉不轉耳